

# Unang Surat i JUAN

## Kepurisanan et itueng Surat neng 1 Juan

Itueng unang surat i Juan maya duwang megunang pegperuen. 1. Geyaten itueng memematsa' na mengebiyagan na maya pekikipegsebatu dut Empu' beke' eset Yegang Ye neng si Jesus Kristo, beke', 2. Ipebti' dye atu eset pegandel et kaya sugat neng penuldu'. Itueng kaya sugat neng ketulduan, pegsugiren na meraat itueng dunya', beke' si Jesus neng Yegang et Empu' na lein lang tantung taaw. Pegsugiren et menge' kaya sugat neng menunuldung itue ne subali' melayam taaw eset misan enu negang kesusaan pasal atue't dunya' apang mebawi'. Pegtuldu' dye gasi itueng kepuwasan kaya pesalan eset kenunganang arat etawa pegmerga't kesebeyaan, temed kaya sugat itue.

Bilang pegrungsang et itueng kaya sugat neng ketulduan, metlang na sinugid et nenurat na si Jesus Kristo banar na negmendyaring taaw samat kityu. Pegsugiren ye gasi, subali' megsimerganan tyu ginsan neng mengengandel ki Jesus beke' pegmerga' dut Empu'.

### Ketulduan et itueng Surat

Penegnaan 1:1-4

Pasal et Telang beke' Kelingban 1:5-2:29

Menge' Yegang et Empu' beke' Yegang et Seytan 3:1-24

Keberbenaran beke' Kebelingkegan 4:1-6

Gerar et Pegmerga' 4:7-21

Kepengindeagan et Pengandel 5:1-21

---

### Beres neng Megbegey et Biyag (Juan 1:1-18)

**1** 1-2 Pegsuratan kay kemyu pasal et Kenye neng betangen Beres na megbebgey et biyag na eset penegnanan pe' Ya ne in. Nebunayag itueng Biyag, nebiri' kay Ya in beke' pinegebenaran eset dimyu. Na Ya nekingeg kay, na itueng si Beres nesiakan et mata damen, nesiakan

beke' nekpetan et keremut kay. Indyari pegtuldu' kay dimyu itueng biyag na kaya seskeran dingan et Empu' Ama', na nebunayag damen. <sup>3</sup> Pepebunayag kay pesi eset dimu itueng nebiri' beke' nekingeg kay, supaya kebaya' kew damen eset pekikisembatu dut Empu' Ama' beke' eset yegang ye neng si Jesus Kristo. <sup>4</sup> Pegsuraten kay itue gasi supaya mesukup keenepan tyu.

### **Empu' in Antangan Ye Silu'**

<sup>5</sup> Itueng beres nekingeg kay eset Yegang ye, beke' pepebunayag kay eset dimyu, na antangen i Empu' in silu', tibuuk na menunga, beke' kaya misan enu negang kelingban etawa kereatan eset kenyé. <sup>6</sup> Na ba' pegrugiretyu na kityu kesembatu ye, segwa' megpengebiyagan gasi dut kelingban, megpengembut kityu beke' kaya lang pengebiyagan et kuyun dut keberbenaran. <sup>7</sup> Segwa' ba' pengebiyagan tyu eset ketlangan, ba' enukwan ya in eset telang, kityu pemegunung-unung beke' pegunasan et dugu' i Jesus neng Yegang ye itueng ginsang keselaan tyu.

<sup>8</sup> Na ba' pegrugiretyu na kityu kaya keselaan, pegekalan tyu lang bilug tyu in, beke' kaya ne eset kityu in keberbenaran. <sup>9</sup> Na ba' pepebunayag tyu itueng menge' keselaan tyu, mearap tyu na empunen kityu et Empu', beke' gunasan kityu eset ginsan neng menge' sala' sabab ya in mebentel. <sup>10</sup> Na ba' pegrugiretyu kaya pegrugiretyu, pegbuwaten tyu na meembut Empu', beke' kaya ne eset kityu beres Ye.

### **Si Kristo in, Mengengelet Kityu dut Empu'**

**2** <sup>1</sup> Menge' pegmerganen na keyegangan ku, pegrugiretyu ku itue dimyu apang diki kew megsala!. Temed ba' megkesala' misan sinu, maya mengelet kityu dut Empu' Ama'. Indyari Ya ne in si Jesus Kristo neng Metigna!. <sup>2</sup> Angkansa si Kristo in simaya' eset keempunan et menge' keselaan tyu, beke' diki lang kityu, temed keselaan gasi et ginsang taaw.

<sup>3</sup> Meketantu tyu na mekilala tyu Empu' ba' pegesipen tyu menge' ketehagan ye. <sup>4</sup> Sebarang pegrugid, kwan, "Mekekilala ku kenyé," segwa' penungsang gasi eset kenyeng ketehagan in meakal, beke' kaya eset kenyé keberbenaran. <sup>5</sup> Temed ating penuman eset beres et Empu' in pegmerga' eset kenyé na nenangked. Kwantin tyu mesewran na kityu tu pekisembatu dut Empu'. <sup>6</sup> Sebarang pegrugid na megteteteg ya pekisembatu dut Empu' subali' mengebiyagan samat pinengebiyagan i Jesus Kristo.

### **Bagung Ketehagan teyeg Empu'**

<sup>7</sup> Pegmerganen ku neng kebi'bilaan, lein lang bagung ketehagan pegsuraten ku dimyu, imbes lelagi negang ketehagan eset dimyu tihad et nengengandel kew et Menungang Abar tagna' ti!. Itue e neng

bebresan nekingeg myu ne, kwan, keilangan na megmerganan tyu et kede sembatu. <sup>8</sup> Megsepantun kwantin mepesiring neng sembatung bagung ketehagan itueng pegasusurat ku dimyu. Itueng keberbenaran et ketehagan itue neseksian eset biyag i Kristo beke' mekebiri' gasi eset kityu. Sabab eset dimyu mepapas ne kelingban beke' megtetelang ne itueng tantung silu'.

<sup>9</sup> Sebarang pugsugid na ye in dut ketlangan, segwa' pegkutukan eset tipused na mengganel, ya in duntin nega't kelingban. <sup>10</sup> Sebarang pegmerga' et tipused ye tatap nega dut ketlangan, indyari diki angkan na mesimbakud dut keselaan. <sup>11</sup> Segwa' itieng pegkutukan et tipused ye dut kelingban nega. Megpepanew ya eset kelingban beke' diki mekesewran ba' embe surungan, sabab binleg ne ya et kelingban.

<sup>12</sup> Menge' keyegangan, pgsuraten ku dimyu, sabab inampun ne keselaan myu pebiya' ki Kristo. <sup>13</sup> Menge' keemaan, pgsuraten ku dimyu, sabab nekilala myu ne si Kristo sengkepuunan nega ya ne in. Pgsuraten ku dimyu menge' kesuburan, sabab neraag myu ating mereraat neng si Seytan. <sup>14</sup> Sinuratan ku kemyu, menge' keyegangan, sabab nekilala myu Empu' Ama'. Sinuratan ku kemyu menge' keemaan, sabab nekilala myu ne na Ya ne sengkepuunan nega in. Sinuratan ku kemyu menge' kesuburan, sabab mebebasag kew, megteteteg eset dimyu beres et Empu' beke' dinaag myu ya neng meraat, si Seytan.

<sup>15</sup> Kasi' myu pegmergana' itueng mereraat na keradya atue't dunya!, etawa itueng menge' keginisan atue't dunya!. Sebarang pegmerga' et mereraat atue't dunya!, kaya pegmerga' dut Ama' eset keny. <sup>16</sup> Sabab ginsan eset dunya!, ating mereraat neng mekeiregan et diri', beke' itueng mekesurug et penyek, sampay pedalu-dalu et kedeyahanen, lein mewanau dut Empu' Ama', imbes eset menge' meraat neng napsu' et menge' taaw et itueng dunya!. <sup>17</sup> Lumibwas dunya' sampay ginsan neng mekeiregan esentin, segwa' sebarang megsunud dut kegeayan et Empu' megbiyag kaya seskeran.

### Ating Kesagka' ki Kristo

<sup>18</sup> Menge' yegang ku,mekabi' ne ketbesan! Samat nekingeg myu ne in, dumateng ne ating Kesagka' ki Kristo. Tiban pesi mekansang ne megtebu' menge' kesagka' i Kristo, angkansa sewd tyu na mekabi' ne ketbesan. <sup>19</sup> Misan kwantin dye ne in lelaging kesebayaan tyu, lein lang tantung kesembatu tyu itieng menge' taaw. Sabab dye in ba' tantu eset kityu, tatap masi teyen dye kebaya' tyu tiban. Segwa' nugad dye, angkansa metlang ne na ginsan dye in kaya tantu.

<sup>20</sup> Temed dinuul ne dimyu et Nakem et Empu' pebiya' et ating Pasek Metigna', si Jesus Kristo. Indyari sabab et itue, ginsan kew megkesewran ne keberbenaran. <sup>21</sup> Pgsuraten ku dimyu, diki punsabab na kaya

nesewran myu keberbenaran. Imbes, sabab sewd myu ne itue in, beke' sewd myu gasi kaya keekalan mawa' eset keberbenaran.

<sup>22</sup> Sinu taku' meakal in? Diki be taku' itueng pegragska' na si Jesus in ating Kristo? Ating taaw Kesagka' ki Kristo, itueng megpegsungu dut Empung Ama' beke' dut Yegang Ye. <sup>23</sup> Sebarang megpegsungu dut Empung Yegang, atin megpegsungu gasi dut Empu' Ama'. Na ba' terimanen et misan sinu Yegang in, sampay Ama' in mese't kenyé.

<sup>24</sup> Ingetan myu eset pusu' myu itueng bebresan nekingeg myu et sengkepuunan nega. Na ba' buwaten myu itue, meneteg kew dut Yegang beke' dut Ama'. <sup>25</sup> Indyari itue ne tinange' kityu i Kristo in, na itueng biyag na kaya seskeran.

<sup>26</sup> Sinuratan ku kemyu itueng menge' ginis supaya megdyaga myu pasal eset menge' balu' neng menunuldu' na megaay mengrunding dimyu pasal et banar na ketulduan. <sup>27</sup> Segwa' dinuul ne i Kristo eset dimyu in itueng Nakem et Empu'. Indyari sasat Ya megteteteg eset dimyu, diki kew ne keilangan tulduan et misan sinu nega pasal et keberbenaran. Itueng Nakem et Empu' megtutuldu' ne dimyu dut ginsan neng keginisan, indyari banar ne itueng pegtutuldu' ye, lein lang keekalan. Angkansa samat pegtuldu' et Nakem et Empu', tumeteg kew pekikisembatu ki Kristo.

<sup>28</sup> Angkansa pesi pegmerganen ne' menge' yegang, tumeteg kew eset Kenye pekikisembatu, supaya megmendyaring mesingkaya' penedseled tyu, eset pegpeuli' ye atue beke' diki tyu ne lumeew Kenye eset atin neng eldew. <sup>29</sup> Na ba' sewd myu si Kristo in, metigna', subali' mesewran myu gasi itueng kede megpemuwat et metigna' in yegang et Empu'.

### Kityu menge' Yegang et Empu'

**3** <sup>1</sup> Etura' myu ba' enukwan dekla' itueng pegmerga' eset kityu et Empung Ama'! Pegtingkagen Ye kityu na menge' yegang Ye, indyari atin key kebenaran. Itue ne punsabab ba' manu kaya tyu nekilala et taaw atue't dunya', kaya dye pegkilelanen Empu'. <sup>2</sup> Menge' pegmerganen ku neng menge' bi'bila', tiban neng masa, kityu tu' yegang ne't Empu', segwa' kayangga pe' nepebunayag itueng mengdyaring kebtangan tyu. Megsepantun gasi, nesewran tyu pegpeuli' gasi i Kristo atu', kityu tu' mepesiring eset kenyé, sabab mebir'i tyu ya eset lulus neng kebtangan ye. <sup>3</sup> Angkansa misan sinu nega na maya pegarap eset ki Kristo, atin megpekelinas, sali' i Kristo, Ya in melinas.

<sup>4</sup> Sebarang pegkesala' in, megsagka' eset menge' sara' et Empu', sabab itueng keselaan megsagka' et ketehagan. <sup>5</sup> Nesewran ne natu' si Kristo apang ugaren itueng keselaan tyu, indyari Ya in kaya lang sala!. <sup>6</sup> Itueng megteteteg eset pekikisembatu ki Kristo, kaya lang mekepelahyun et keselaan. Itueng taaw mekepelahyun et keselaan kaya mekebiri' etawa mekekilala eset Kenye.

<sup>7</sup>Pegmerganen ne' menge' yegang, kas kew perunding et misan sinu nega. Sebarang pemuwat et metigna' in, metigna' ya, samat antangan i Kristo neng metigna'. <sup>8</sup>Sebarang pepelahyun et keselaan, ya in tindeg i Seytan, sabab tihad et sengkepuunan nega megpemuwat ne et keselaan itueng si Seytan. Indyari natu' si Jesus neng Yegang et Empu' supaya rungkaten itueng menge' pegbuwaten i Seytan.

<sup>9</sup>Sebarang tinerima et Empu' na megmendyaring yegang ye in, diki ne megpelahyun et keselaan ye, sabab ya in maya ne bagung biyang mewanana dut Empu'. Indyari ganang Empu' tu' Ama' ye, diki ne ya mekediyari mekepelahyun et keselaan. <sup>10</sup>Mekilala atue na ba' sinu menge' yegang et Empu' beke' ba' sinu menge' yegang i Seytan. Misan sinu nega na kaya pegpemuwat et mebentel beke' kaya pegmerga' et tipused ye in eset Empu', lein lang ya yegang et Empu'.

### **Megmerganan Kew Kede Sembatu Dimyu**

<sup>11</sup>Sabab itue neng ketulduan na nekingeg myu tihad et sengkepuunan nega, na keilangan kityu na megmerganan tyu kede sembatu. <sup>12</sup>Kas kew sumiring ki Kain. Ya in yegang et Seytan. Ya in nematey et ari' ye si Abel. Manu pinatey ye tipused ye? Sabab mereraat buwat ye, segwa' metigna' buwat et tipused ye.<sup>a</sup>

<sup>13</sup>Angkansa menge' ketipusdan, kas kew peglilu' ba' pegkutukan kew et taaw atue't dunya'. <sup>14</sup>Nesewran tyu ne na negpinda tyu ne't biyang mewanana eset kemetaryan, sabab pegmerganen tyu ne ketipusdan na mengganel. Sebarang kaya pegmerga' in megteteteg dut kemetaryan.<sup>b</sup> <sup>15</sup>Sebarang pengutuk et tipused ye, atin memematey-taaw lang, beke' nesewran myu gasi itueng biyang neng beberapa in kaya eset memematey-taaw. <sup>16</sup>Atue ne mekilala tyu itueng tantung pegmerga': Linila' i Kristo biyang ye sabab eset kityu. Subali' gasi ilila' biyang tyu in sabab eset menge' ketipusdan set pengandel. <sup>17</sup>Temed ba' nebiri' et misan sinung deyahan tipused ye na nesigpitan, indyari kaya ye itue tinebangan, enukwan tyu mesugid na ya tu' pegmerga' dut Empu'? <sup>18</sup>Menge' pegmerganen ku neng yegang, dyangan tyu megmerga' pebiya' et beres etawa pegrugid lang in. Ipebiri' tyu teyen tantung pegmerga' pebiya' et buwat sampay dut kebebenaran.

### **Mesanang Pusu' dut Elepa't Empu'**

<sup>19</sup>Atue tyu mesewran na kityu tu' tudyu eset keberbenaran, beke' metuakal penedseled tyu eset teyumanan et Empu'. <sup>20</sup>Na ba' kityu tu' pegeriweraen et penedseled tyu sabab et keselaan, kesewd tyu na Empu' in luwas nega eset penedseled tyu, beke' sewd Ye ginsan

<sup>a</sup> 3:12 Tagna' 4:1-16    <sup>b</sup> 3:14 Juan 5:24

neng keginisan. <sup>21</sup>Menge' pegmerganeng kebi'bilaan, na ba' kaya tyu pegeriweraen et penedseled tyu, mesanang seled tyu nakekabi' dut Empu'. <sup>22</sup>Pegterimanen tyu misan enu negang pegtewen tyu eset Kenye, sabab pegendelen tyu itueng menge' ketehagan Ye beke' pegbuwaten na mekeenep eset Kenye. <sup>23</sup>Na! itue ne ketehagan Ye, mengandel tyu eset Yegang Ye neng si Jesus Kristo. Pegketbes subali' megmerganan kityu et kede sembatu, samat penahag et Empu' eset kityu. <sup>24</sup>Sebarang pengandel eset ketehagan et Empu' in pengebiyagan na pekikisembatu dut Empu', beke' pengebiyagan na pekikisembatu gasi eset kenye in Empu'. Indyari pebiya' eset Nakem Ye na dinuul et Empu' eset kityu in, mekesewran tyu pengebiyagan na pekikisembatu ne Ya eset kityu.

### **Ating Nakem mawa' dut Empu' beke' Meyaat Nakem mawa' dut Kesagka' ki Kristo**

**4** <sup>1</sup>Menge' pegmerganeng kebi'bilaan ku, kasi' myu megtuy pegesipa' ginsan pgsugid na megsaleb kedye Nakem et Empu'. Imbes sulayan myu mena apang mesewran ba' mawa' dut Empung Nakem na megsaleb kedye, sabab mekansang neng pebe'belung tarus megtebu' eset dunya!. <sup>2</sup>Esentin ne mekilala myu ba' sinu seled penggewman neng Nakem et Empu': Itueng pepebunayag na si Jesus Kristo negmendyaring taaw in, ya key eset penggewman et Nakem mawa' dut Empu'. <sup>3</sup>Megdemikian gasi sebarang kaya pepebunayag et kwantin pasal ki Jesus in, kaya mawa' dut Empu'. Imbes, ya in mawa' dut Kesagka' ki Kristo na penggewma't kenye ne. Nesugid ne eset dimyu in na itue dumateng, beke' tiban pesi eset dunya' ne.

<sup>4</sup>Pegmerganen ne' menge' yegang, kemyu in dut Empu' ne, beke' nengindaag kew ne eset pebe'balu' neng tarus, sabab itueng Nakem eset dimyu in mekepengyedian luwas nega si Seytan neng kepegegwla' et menge' kaya mengengandel. <sup>5</sup>Dye in eset dunya', angkansa mawa' eset dunya' gasi pegtuld' dye, indyari megkingeg kedye itueng taw't dunya'. <sup>6</sup>Temed kityu tu' dut Empu'. Sebarang pengilala dut Empu' in, megkingeg eset kityu. Segwa' kaya megkingeg kityu sebarang diki lang dut Empu'. Kwantin pesi mekilala tyu ba' sinu maya Nakem neng keberbenaran etawa nakem neng keselaan.

### **Empu' in Daran Megmerganan Ginsa't Taaw**

<sup>7</sup>Menge' pegmerganeng kebila'bilaan, megmerganan tyu et kede sembatu, sabab mawa' dut Empu' pegmerga'. Itueng kede pegmerga', atin yegang et Empu' beke' pengilala dut Empu'. <sup>8</sup>Itueng kaya pegmerga' kaya pengilala dut Empu', sabab Empu' in daran megmerganan ginsa't taaw. <sup>9</sup>Kwantin enukwan pinebunayag et Empu' pegmerga' ye kityu, ganang tehagen ye sembebatung Yegang ye atu't dunya' apang maya tyu

biyag pebiya' keny. <sup>10</sup> Itue ne patus et tantung pegmerga', diki kwan na minerga' tyu Empu', imbes kityu key pegmerganen Ye, angkansa linugut itueng Yegang Ye apang megmendyaring simaya' eset keempunan et keselaan tyu.

<sup>11</sup> Menge' pegmerganeng kebi'bilaan, misan kwantin kerekla' pegmerga' et Empu' eset kityu, subali' tyu gasi megmerganen kityu et kede sembatu kityu. <sup>12</sup> Kaya misan sinung taaw na kebiri' dut Empu', segwa' na ba' kityu megmerganan, Empu' in eset kityu, angkansa negmendyaring tibuuk eset kityu pegmerga' Ye.

<sup>13</sup> Nesewran tyu na megteteteg tyu dut Empu' beke' Ya gasi megteteteg ne eset kityu, sabab binggey Ye ne eset kityu Menungang Nakem Ye.

<sup>14</sup> Na' nebiri' kay beke' pinesebenaran na dinaak et Ama' Yegang Ye bilang Mememawi' et ginsa't taw't dunya!. <sup>15</sup> Sebarang pepebunayag na si Jesus yegang et Empu' in pengebiyagan na megteteteg dut Empu', indyari Empu' gasi in, pengebiyagan na megteteteg eset keny. <sup>16</sup> Angkansa pegsesewren tyu beke' pepengerapan ating pegmerga' et Empu' eset kityu.

Empu' in daran megmerganan ginsa't taaw. Sebarang pepelahyun et pegmerga' in atin pegbibiyagen et pekikisembatu dut Empu', beke' pegbibiyagen et pekikisembatu gasi eset keny in Empu'. <sup>17</sup> Kwantin itueng pegmerga' megmendyaring sukup dut kityu supaya diki tyu tekutan ating eldew't pegukum, sabab kityu tu' sali' i Kristo misan atue nega't dunya' tu!. <sup>18</sup> Kaya megbebaya' takut itueng tantung pegmerga', sabab inugad ne't sukup na pegmerga' itueng misan enu negang ketetekutan. Indyari kayangga pe' sukup pegmerga' et misan sinung megtakut, sabab takut na kesugpun et kedusaan.

<sup>19</sup> Kityu pegmerga' sabab Empu' unang negmerga' kityu. <sup>20</sup> Sebarang pegberes, "Pegmerganen ku Empu'", indyari pengutuk gasi et tipused ye in dut pengandel, meakal. Na ba' itieng tipused ye na mekebiri' ye na kaya ye pegmerganen, deulu' mene gasi taku' meraganen ye Empu' na kaya ye itue mekebiri? <sup>21</sup> Itue ne ketehagan na binggey eset kityu et Empu', sebarang pegmerga' dut Empu' subali' gasi ya megmerga' et tipused ye eset ki Kristo.

### Nengindaag tyu atue't Dunya'

**5** <sup>1</sup> Pegekuuen na menge' yegang et Empu' sebarang pengandel na si Jesus in Mesias! Beke' sebarang sinu negang pegmerga' dut ama' in, pegmerga' gasi dut yegang ye.<sup>c</sup> <sup>2</sup> Itue ne bilang tenda' na pegmerganen tyu menge' yegang et Empu', na ba' pegmerganen tyu Empu' beke'

<sup>c</sup> 5:1 "Mesias", ingin bersen atin dinuulan et Empu' na mememegbeg et dunya!. Mesias dut bebresan et Griego sinurat "Kristos", dut Hebreo sinurat "Mesias."

pegtumanen menge' ketehagan ye. <sup>3</sup>Sabab itueng pegmerga' et tantu dut Empu', itieng penuman et menge' ketehagan Ye. Indyari kaya gasi meliyut tumanen itueng menge' ketehagan Ye, <sup>4</sup>sabab nepengindeagan et kede yegang et Empu' itueng meraat atu't dunya!. Angkansa pengindaag tyu pebiyal' et pegandel tyu. <sup>5</sup>Sinu taku' itueng mekepengindaag atu eset meraat atu't dunya? Sebarang lang pengandel na si Jesus in Yegang et Empu'.

### Pesebanar Pasal ki Jesus Kristo

<sup>6</sup>Si Jesus Kristo natu' et dunya' teyeg et langit, binewtismuan et danum, beke' negpeturu' et dugu' Ye eset kepeteyan Ye dut krus. Diki lang gasi binewtismuan eset danum, imbes binewtismuan eset danum sampay negpeturu' nega et dugu' ye. Sampay itueng Nakem et Empu' negpesebanar pasal itue, sabab itueng Nakem daran mesugid et keberbenaran. <sup>7</sup>Telu dye in negpesebanar, <sup>8</sup>itueng Nakem et Empu', itueng binewtismuan eset danum, beke' itueng dugu' neng sinimaya!. Indyari pemegtibuuk telu in. <sup>9</sup>Pegterimanen tyu pesebanar et taaw, segwa' lebing mepagen pesebanar et Empu'. Indyari itie ne pesebanar et Empu' pasal eset Yegang ye. <sup>10</sup>Sebarang pengandel dut Yegang et Empu' in, pengasip eset itueng pesebanar eset atey ye. Segwa' itieng mendi' mengandel dut Empu' in, pineantang na meakal Empu', sabab kaya pegendelen ye pesebanar et Empu' pasal et Yegang Ye. <sup>11</sup>Indyari itue ne pesebanar: Dinuul ne kityu et Empu' biyang na kaya seskeran beke' biyang ne itue meterima tyu lang pebiyal' eset Yegang Ye. <sup>12</sup>Sebarang pegtetegan et Yegang et Empu' in, maya biyang na kaya seskeran. Segwa' sebarang diki pegtetegan et Yegang et Empu' in, kaya biyang eset keny.

### Biyag na Beberapa dut menge' Mengengandel

<sup>13</sup>Pegsuraten ku itue dimyu apang mesewran myu na kemyung mengengandel dut Yegang et Empu' in maya biyang na kaya seskeran. <sup>14</sup>Diki tyu megalang-alang kumabi' eset Empu', sabab sewd tyu ne misan enu negang tewen tyu na sigun dut kegeayan Ye, na pegkinggen Ye kityu. <sup>15</sup>Sampay ba' sewd tyu ne pesi na pegkinggen Ye kityu, sewd tyu ne gasi na pegbegey Ye itueng pegtewen tyu eset Kenye.

<sup>16</sup>Na ba' mebiri' et misan sinu negang tipused ye set Kristo in pemuwat et keselaan diki sumked dut kepeteyang nakem, ipenelang ye tipused ye in, indyari itue begeyan et Empu' et bagung biyang. Itue tudyu dut menge' tipused na keselaan in diki sumked kepeteyang nakem. Segwa' maya keselaang sumked dut kemeteyang nakem, indyari diki ku pegrugirena na ipenelengana' myu itueng misan sinu negang megpemuwat et itue. <sup>17</sup>Ginsan neng meyaat neng keradya na kaya mebentel in, keselaan, segwa' maya keselaang diki sumked dut kepeteyang nakem.

<sup>18</sup> Sewd tyu ne itueng menge' Yegang et Empu' in diki megpelahyun et keselaan, sabab pegingetan dye i Jesus Kristo neng Yegang et Empu', diki dye mekedyari meusiba' et si Seytan.

<sup>19</sup> Sewd tyu ne na kityu tu' yegang et Empu', indyari ginsa't taaw et itueng sengkelingkepa't dunya' in eset kepengyedian i Seytan.

<sup>20</sup> Indyari pegsesewren tyu, natu' Yegang et Empu' beke' binggeyan ye kityu et keeturan apang mekilala tyu Empu' na banar. Na tiban pekikisembatu tyu eset Empu' sabab et Yegang Ye neng si Jesus Kristo. Si Jesus ne tantung Empu' beke' puun et biyag na kaya seskeran.

<sup>21</sup> Pegmerganen ne' menge' yegang, pereyuni' myu menge' empu'empuan.